

Date – 13/04/2025

Time - 18:30 Hrs

1. Mizoram leh Assam ramri buaina chinfel tuma sorkar official-te tun thla ni 25 khian Guwahati-ah inbe turin ruahmanna siam fel a ni.
2. Manipur Churachandpur districta ui-a hri nasa taka a len avangin a depa awm Aizawl leh Saitual district-ah tunhnai-ah ui-a hri venna lak an uar hle.
3. Mizoram ramri hnaihah Directorate of Revenue Intelligence (DRI)-in cheng vbch 52 chuang hu methamphetamine an man.
4. Kum 2 lo awm tur chhung hian ramchhunga motor kawngpui, a bikin hmarchhak leh ramri bulte tihchangtlun nan sorkar laipuiin cheng vbch 10 ruahman a tum tih Road Transport & Highways Minister, Nitin Gadkari-a'n a sawi.

<><><>

BORDER TALKS

Mizoram leh Assam ramri buaina chinfel tuma sorkar official-te tun thla ni 25 khian Guwahati-ah inbe turin ruahmanna siam fel a ni.

Home department atanga thu dawn danin Mizoram sorkar aiawhte hi official 7 niin, home secretary Pu Vanlalmawia'n a ho ang a. An ruahman dan chuan April ni 24-ah thlawhna hmanga Aizawl chhuahsan a hemi ni veka Guwahati thlen a, inbuatsaih nghal tum a ni a. Mizoram leh Assam official-te inbiakna turah hian ramri buai chungchanga a hma lama lo sawi tawh leh state pahnih la inrem theih lohnate sawiho leh a, kimchang taka thil awmdan inhrilh tawn tura ruahman a ni a. Official-te an inbiakna rah chhuah a zirin Mizoram home minister leh Assam border protection & development minister te a vawi ngana atana inbiakna chhunzawm tura ngaih a ni a. Tun tumah hian ni khat chauh inbiak phawt tur a ni a, thil awmdan a zirin official-te inbiak chhunzawm leh rawt a ni mai thei bawk ni a thudawn a ni.

Puan tawh thin angin kum 2021 July ni 26 a Vairengte dai-a state pahnih Police-te'n silai hial an hmehpuah tak avang khan ramri buai chinfel dan tur hi chak zawka dap a ni ta a. Hemi kum vek hian Assam border protection & development minister Pu Atul Bora hovin Assam palaite Aizawlah lokal in khatih laia home minister Pu Lalchamlia ho Mizoram palaite nen an inbia a. A kum lehah Aizawlah bawk inbe lehin kum 2022 November thla khan Guwahati-ah minister pahnih kaihhruaite hi an inbe leh a. Nikum August ni 9 khan Aizawlah inbe lehin hetah hian kumin March ni 31 hma a inbiak chhunzawm leh tura tih chu an hman ta lova. Official-te inbe phawt se tiin thutlukna siam a ni ta. Nimin pia lawk khan April ni 25 a inbiak leh a kal turte hi Mizoram sokarin a tichiang ta chauh a ni.

<><><>

PALM SUNDAY

Kristian te ni pawimawh Jerusalem khawpuia Isua Krista lal anga a luhna ni hriatrengna, 'Tumkau Ni' pualin tukin khan Mizoram puma kohhran hrang hrangin kawng an zawh.

Tumkau Ni hi Isua Krista krawsa khenbeh hma Pathianni hnahnung bera hman thin a ni a. He ni pual hian Mizoram hmun hrang hrangah kohhran hrang hrangin kawng an zawh a, Kohhran tam zawkah chuan Sunday School zirlai, zirtirtute leh Kohhran mipuite tumkau kengin 'Hosanna' tiin zingkarah khawlai fangin an aurual a, Pathian fakna hla te an sa bawk a ni.

Tumkau Ni pual hian Mizoram chhunga kohhran hrang hrangte chuan chawhma, chawhnu leh zanah inkhawm programme an duang a. Kohhran thenkhatah chuan chawhma Sunday School neiin chawhnu leh zanah Tumkau ni pual in hun an hmang thung a. Kohhran thenkhat chuan Tumkau Ni pual hian thupui bik neiin hun an hmang bawk a ni.

Catholic kohhran pawhin Tumkau Ni hi urhsun takin an hmang a. Kohhran dangte anga zing kara kawngzawh ve lovin inkhawm hun pangngaiah, Kohhran pum

pui-in kawng an zawh a. Kawngzawh tanna hi inkhawm ‘Mass Thianglim’ tanna a ni nghal ani. Catholic kohhrante’n biak-in luh atangin Passion Sunday - Lungngaih Pathianni a intan a, chumi lam hawi veka rawngbawlna neih a ni. Passion Reading- Isua an man atanga a thih thleng chhiar a ni a. Chawlhkar thianglim intanna a ni baw k a, Maundy Thursday, Good Friday, Holy Saturday / Easter Vigil leh Easter thlengin urhsun taka hman tanna ni a ni. Hetih lai hian district hrang hrangah pawh Tumkau ni hi hlim taka hman a ni a. District hrang hranga kohhran hrang hranga tualchhung kohhran theuhte’n Tumkau Ni pual hian tumkau kengin kawng an zawh a.

<><><>

RABIES VACCINATION

Thenawm Manipur state a Mizoram dep Churachandpur district-a ui-a hri a len avangin tun lai hian Saitual leh Aizawl district-ah ui-a hri danna a ui chiutir an tam hle.

Akashvani Aizawl in thu a dawn danin kar kalta chhung khan ui 330 zet chu Aizawl Khatla a Mizoram Polyclinic Hospital-ah ui-a hri danna chiu tir an awm a. Thawhtanni khan ui 20 vel hri danna pek an ni a, Thawhlejni-ah ui 63, Nilaini-ah ui 105 leh Zirtawpni-ah ui 141 hri danna pek an ni baw k a. Ningani kha sorkar pisa chawlh a nih avang leh nimin kha tun thla a Inrinni vawi 2-na a nih avangin ui-a hri danna pek an awm lo niin Vety department hotute chuan an sawi. Aizawl leh Saitual district hi Manipur depa awm ve ve a nih avangin Churachandpur district-a ui-a hri leng hi a rawn luh loh na'n theihtawp chhuah a nih thu department hotute chuan an sawi a. Saitual-ah chuan Ningani khan ran hriselna beihpui thlakin hemi ni hian ui 406 chu ui-a hri danna anti rabies vaccine (ARV) pek an ni.

Saitual District Veterinary Hospital-ah hian Ningani khan World Veterinary Day pualin ran hriselna a thlawna endik runpui "Animal Health Camp" huaihawt a ni a. Hemi ni hian Saitual leh Keifang mipui tan Vety Hospital Building a hun hman a nih bakah khaw thenawm, Rulchawm, Ruallung, Sihfa leh Dilkhanah insemдарhin hun hman zui a ni. Ui-a hri danna pek bakah ran dang chi hrang hrang entir leh zai a ni a, ran vulhna hmuna kal chilhte a awm baw k. he huna ran enkawlna pek hi 611 an tling a ni.

He tih lai hian Aizawl leh Saitual district magistrate bakah Serchhip leh Hnahthial district magistrate te chuan Manipur atanga ui leh uisa lakluh khapna thupek an chhuah a. Ui chhuah khapin an pawn chhuak a nih pawhin a neitu-in hrui a kaih tur a ni an ti a. The Mizoram Animal (Control & Taxation) Rules, 2016 in a phal angin a neitu tel lova khawlaia Ui chhuak te chu Village Council ten an man thei ang a. Ui neitu te hian nikhat zelah Ui chaw man Rs.100/- leh fine Rs.100/- chawiin an khul chhuah tir thei ang a. Ni 7 chhunga khul chhuah a nih loh chuan a remchan dan a lilama tih ral theih a ni ang. Ui khuahkhirh lohvin mihring a seh chuan Section 291 BNS, Ui neitu chu thla 6 (ruk) chhung lungin tan emaw Rs.5,000/- thleng emaw chawi theih a ni baw k.

District magistrate te thupek chhuah hi an tihchhuah atanga thla 2 chhung huam tura tih a ni a. Thupek bawhchhiate chu Bharatiya Nyaya Sanhita (BNS), 2023 section 223 hmanga hrem theih an ni ang.

<><><>

AMC

Director of local fund audit in kum 2019-20 leh kum 2022-23 tangka kum chhunga Aizawl Municipal Corporation (AMC) sum hman dan a endikna-ah chuan hek leh mipui sum heu zawnga pawisa tam tham tak hmanna a hmu chuak.

Tuirial a bawlhhlawh paihna hmun - solid waste management centre (SWMC) siamna atan tangka kum 2022-2023 chhung khan AMC hian mimal ta lei laihna khawl (JCB) hman manah cheng vaibelchhe 1 leh nuai 26 vel a seng a. Director of Local Fund Audit on the Accounts of Local Authority report atanga a lan dan chuan AMC hian ama pualin JCB hi 3 an nei ve reng a, 3 zinga pakhat phei chu SIPMIU hnen atanga an dawn a ni nghe Nghe a. Chuti chung chuan bawlhhlawh sawngbawlna hmun tur laihna atan hian ni 255 chhungin cheng vaibelchhe 1 leh nuai 26 thelh a seng a. JCB pathum zinga pahnih leina atana AMC senso hi cheng nuai 49 chuang hret chauh a nih laiin mimal JCB hmanga cheng vaibelchhe 1 leh nuai 26 vel sen a ni hi an sum endiktu (auditor) te chuan a sum ren loh thlak hle-ah an ngai a. AMC chuan mimal JCB an hmanna chhan chu an JCB neih pathumte a chhiat lai a nih vang niin an sawi thung.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

DRI SEIZES METHAMPHETAMINE

Mizoram ramri hnaihah Directorate of Revenue Intelligence (DRI)-in cheng vbch 52 chuang hu, methamphetamine Kg. 52 leh gram 67 an man a, a neitu nia puh mi 2 an man bawk. Vawiina Union Finance Ministry thuchhuah tarlan danin, ruihhlo hi April ni 11 zana man a ni a, truck pakhat an dapnaah uluk taka fun bawm 53 vel an hmuchhuak a, bawm pawn lamah hian 3030 Export Only tihte, 999 tihte a inchhut bakah lungflu symbol ang chhut kai vek a ni bawk a, bawm chhunga thil awmte chu NDPS Field Test Kit-a endik anih hnuah Methamphethamine an ni tih nemngheh a ni.Heng ruihhlothe hi Myanmar atangin Zokhawthar sector atanga Mizoram chhunga lak luh a ni a, truck driver leh a handyman-te hi ND&PS Act tlawhchhanin man nghal an ni.

<><><>

NITIN GADKARI

Kum 2 lo awm tur chhung hian ramchhunga motor kawngpui tihchangtlun nan sorkar laipuiin cheng vbch 10 ruahman a tum tih Road Transport & Highways Minister, Nitin Gadkari-a’n sawiin hmar chhak bial leh ramri bulte ngaih pawimawh zual a ni ang, a ti.

He thu hi news agency-in a kawmnaah sawiin Pu Gadkari-a chuan ramchhunga hmasawnna ruhrelte chu khawvela a tha ber tluk phak turin kum 2 lo awm tur chhung hian sorkar laipuiin nasa takin siam that a tum a ni, a ti a, hmarchhak bial kawngpuite chu United States el thei tur khawpa siam tum a ni, a ti.

Hmarchhak bial chu kham chhengchhe tak tak tamna leh thenawm ram engemaw zat ramri bula awm anih avangin kawngpui siam thatna tur ruahmanna siam thuai a tul tih sawiin cheng vbch nuai 3 sing 7 chuang senga Km. sing 2 sang 1 leh 300 chuang siamna tur highway project 784 kalpui a ni ang, a ti a, hmarchhak bikah kumin chhung hian cheng vbch nuai 1 vel hu project chi hrang hrang thawh anih tur thu a sawi bawk.

<><><>